

分類補註李太白詩卷之二十

遊宴

○遊南陽白水登石激作

朝涉白水源暫與人俗踈島嶼佳境色江天
涵清虛目送去海雲心閑遊川魚長歌盡落

日乘月歸田廬

齊賢曰隨州西北二百里曰棗陽縣有春陵故城在縣東

漢元帝時春陵侯以其國地卑濕因割蔡陽之白水上唐二鄉為春陵侯邑

遊南陽清泠泉

惜彼落日暮愛此寒泉清西輝逐流水蕩漾
遊子情空歌望雲月曲盡長松聲齊賢曰薛綜注清泠水名在南陽西鄂山上

尋魯城北范居士失道落蒼耳中見

范置酒摘蒼耳作

鴈度秋色遠日靜無雲時客心不自得浩漫
將何之忽憶范野人閑園養幽姿茫然起逸
興但恐行來遲城壕失往路馬首迷荒陂不

惜翠雲裘遂為蒼耳欺入門且一笑把臂君

為誰齊賢曰蒼耳即卷耳今所謂羊負菜酒客愛秋蔬山盤薦

霜梨他筵不下筵此席忘朝飢酸棗垂北郭

寒瓜蔓東籬還傾四五酌自詠猛虎詞近作

十日歡遠為千載期風流自簸蕩謹浪偏相

宜酣來上馬去却笑高陽池齊賢曰古猛虎行曰飢不從猛

虎食暮不從野雀栖山簡鎮襄陽遊高陽池事見前

東魯門泛舟二首

日落沙明天倒開波搖石動水縈迴輕舟泛
月尋溪轉疑是山陰雪後來齊賢曰王子猷雪夜訪戴事見

其二

水作青龍盤石堤桃花夾岸魯門西若教月
下乘舟去何當風流到剡溪士贊曰剡溪見前

秋獵孟諸夜歸置酒單父東樓觀妓

傾暉速短炬走海無停川異餐圓丘草欲以

還顏年此事不可得微生若浮煙齊賢曰抱朴子圓丘

多大蛇又生好藥黃帝將登焉廣成子告之佩雄黃而衆蛇皆去駿發跨名

駒彫弓控鳴弦鷹豪魯草白狐兔多肥鮮邀

遮相馳逐遂出城東田一婦四野空喧呼鞍

馬前歸來獻所獲炮炙宜霜天出舞兩美人

飄飄若雲仙留歡不知疲清曉方來旋齊賢曰毛

詩箋云駿疾也

遊太山六首

四月上太山石屏御道開六龍過萬壑澗谷
隨縈迴馬跡遶碧峯于今滿青苔飛流洒絕
巘水急松聲哀北眺崿嶂竒傾崖向東摧洞
門閉石扇地砥與雲雷齊賢曰元宗開元十
三年有事泰山其登
也神仙傳八公與劉安登山所踏山上石皆
陷成跡至今人馬跡猶存唐貞觀中長公弼
與華陰雲臺觀劉法師在蓮花峯東隅至二
石壁高千餘仞下臨無底之谷一逕闊數寸
法師與公弼側足而立公弼以指叩石壁遂
劃然開一門中有天地日月士贇曰登高望
六龍是用周易時乘六龍以御天事

蓬瀛想象金銀臺天門一長嘯萬里清風來
玉女四五人飄颻下九垓含笑引素手遺我
流霞杯稽首再拜之自愧非仙才曠然小宇
宙棄世何悠哉齊賢曰漢志齊威宣燕昭使
人入海求蓬萊方丈瀛洲此
三神山諸仙人及不死之藥皆在焉其物禽
獸盡白而黃金銀為宮闕未至望之如雲及
至反居水下泰山記泰山盤道屈曲而上凡
五十餘盤經小天門大天門仰視天門如從
穴中窺天窓

其二

清曉騎白鹿直上天門山山際逢羽人方瞳
好容顏捫蘿欲就語却掩青雲關遺我鳥迹
書飄然落巖間其字乃上古讀之了不閑感
此三嘆息從師方未還齊賢曰拾遺記老聃其瞳方仙書云眼方
者壽千歲黃帝之史沮誦蒼頡眺彼鳥跡始
作書契漢書謂之科斗書尚書序上古之書
謂之尚書士贊曰葛洪神仙傳漢武帝問居
殿上忽有人乘雲車駕白鹿從天而下來
集殿前帝驚問為誰
曰我山中衛叔卿也

其三

平明登日觀舉手開雲關精神四飛揚如出
天地間黃河從西來窈窕入遠山憑崖攬八
極目盡長空閑偶然值青童綠髮雙雲鬟笑
我晚學仙蹉跎凋朱顏躊躇忽不見浩蕩難
追攀齊賢曰泰山東南名曰觀雞一鳴時日
始出長三丈許士贊曰黃河西來見前
卷陶隱居真誥云青童大君曰欲植滅度
根當拔生死氣沉吟墮九泉坐惜形骸棄

其四

清齋二千日裂素寫道經吟誦有所得衆神

衛我形。雲行信長風。颯若羽翼生。攀崖上日
觀。伏檻窺東溟。海色動遠山。天雞已先鳴。銀
臺出倒景。白浪翻長鯨。安得不死藥。高飛向
蓬瀛。齊賢曰。魏文帝詩。服之四五日。身軀生
羽翼。士贇曰。集仙錄。紫虛元君。魏華存
夫人。清齋於陽洛之山。隱元之臺。西王母降
於臺中。傳玉清隱書四卷。以授華。存海色日
出之
光也。

其五

日觀東北傾。兩崖夾雙石。海水落眼前。天光

遙空碧。千峯爭攢聚。萬壑絕凌歷。緬彼鶴上
仙。去無雲中跡。長松入雲漢。遠望不盈尺。山
花異人間。五月雪中白。終當遇安期。於此煉

玉液。

齊賢曰。安期
生事見前。

其六

朝飲王母池。暝投天門關。獨抱綠綺琴。夜行
青山間。山明月露白。夜靜松風歇。仙人遊碧
峯。處處笙歌發。寂靜娛清暉。玉真連翠微。想

像鸞鳳舞飄飄龍虎衣。捫天摘匏瓜恍惚不
憶歸舉手弄清淺。誤攀織女機。明晨坐相失
但見五雲飛。齊賢曰樂書相如蔡琰之綠綺琴名也北史崔浩傳太史奏熒惑在匏瓜星中一夜忽然亡失集林曰昔有人尋河源見婦人浣紗問之曰此天漢也乃與一石歸問嚴君平云此織女支機石今在成都嚴貞觀君平故宅

秋夜與劉礪山泛宴喜亭池

明宰試舟楫張燈宴華池。文招梁苑客歌動
郢中兒。月色望不盡空天交相宜。令人欲泛

海只待長風吹

齊賢曰唐志宋州睢陽郡礪山縣漢梁孝王築東城方三

百餘里大治宮室招延四方豪傑自山東遊士莫不至客有歌於郢中及謝安與孫綽等汎海事見前風土記南中六月有東南長風俗云黃雀長風時海魚變為黃雀因名

携妓登梁王樓霞山孟氏桃園中

碧草已滿地柳與梅爭春。謝公自有東山妓
金屏笑坐如花人。今日非昨日明日還復來
白髮對綠酒強歌心已摧。君不見梁王池上
月昔照梁王樽酒中。梁王已去明月在。黃鸝

愁醉啼春風。分明感激眼前事。莫惜醉卧桃

園東。

齊賢曰：棲霞山在單父縣。漢梁孝王苑中有鴈池。幽詩有鳴鶴鷓。注黃鸝也。

與從姪杭州刺史良遊天竺寺

挂席凌蓬丘。觀濤憇樟樓。三山動逸興。五馬

同遨遊。天竺森在眼。松風颯驚秋。覽雲測變

化。弄水窮清幽。疊嶂隔遙響。當軒寫歸流。轉

成傲雲月。佳趣蒲吳洲。

齊賢曰：漢儀天子六馬。諸侯五馬。錢塘寺

天竺最盛。山有一門。南北相名。而上下兩天竺寺。自西湖入天竺寺路。夾道皆古松。其地

名曰九里松。靈隱天竺同在一處。皆由松門而進。圖經杭州靈山之陰。北澗之陽。即靈隱

寺。靈山之南。南澗之陽。即天竺寺。二澗流水。號錢源泉。遶寺峯南北。至峯前合為一澗。

同友人舟行

楚臣傷江楓。謝客拾海月。懷沙去瀟湘。挂席

泛溟渤。蹇予訪前跡。獨往造窮髮。古人不可

攀。去若浮雲沒。

齊賢曰：宋玉招魂云：湛湛江水兮上有楓。目極千里兮傷

春心。注江水浸潤楓木。使之茂盛。傷已不蒙君惠。而身放棄。不如楓木得所也。屈原作懷

沙賦。事見前。士贇曰：司馬彪曰：窮髮者北極之下無毛之地。地理書以草為髮。願言

弄倒景從此鍊真骨華頂窺絕冥蓬壺望超
忽不知青春度但怪綠芳歇空持釣鰲心從

此謝魏闕

士贊曰倒景絕冥
釣鰲三事並見前

。下終南山過斛斯山人宿置酒

暮從碧山下山月隨人歸却顧所來徑蒼蒼
橫翠微相携及田家童稚開荆扉綠竹入幽
徑青蘿拂行衣歡言得所憩美酒聊共揮長
歌吟松風曲盡河星稀我醉君復樂陶然共

忘機

齊賢曰毛萇曰終南周之名山在長
安之南爾雅曰山未及上曰翠微

朝下過盧郎中叙舊遊

君登金華省我入銀臺門幸遇聖明主俱承
雲雨恩復此休浣時閑為疇昔言却話山海
事宛然林壑存明湖思曉月疊嶂憶清猿何
由返初服田野醉芳樽

齊賢曰唐有銀臺門
通進司檀弓注疇發

侍從遊宿溫泉宮作

聲昔猶前也楚辭進不入以離龍退將復脩
吾初服一士贊曰顏師古曰金華殿在未央後

羽林十二將羅列應星文霜仗懸秋月霓旌
卷夜雲嚴更千戶肅清樂九天聞日出瞻佳
氣葱葱繞聖君齊賢曰廿氏星經羽林府四
室南主羽林衛太子之軍武帝太白元年置
建章營騎後更名羽林騎唐因隋制有十二
衛儀衛志凡朝會之仗三衛番上分為五仗
天子將出前二日大樂令設官縣之樂於庭
畫漏之上五刻駕發前發七刻擊一鼓為一
嚴前五刻擊二鼓為再嚴前二刻三鼓為三
嚴諸衛合督其
隊以次入陳

邯鄲南亭觀妓

歌鼓一作燕趙兒魏姝弄鳴絲粉色艷日彩
舞袖拂花枝把酒顧美人請歌邯鄲詞清箏
何繚繞度曲綠雲垂平原君安在科斗生古
池座客三千人于今知有誰我輩不作樂但

為後代悲齊賢曰詩箋云姝美好之子樂書
唐惟有清樂箏十二絃彈之為鹿

骨瓜長寸餘代指他皆十二絃今教坊無十
二絃者善度曲事見前士贇曰尚書序注曰
科斗虫名
蝦蟆子

春日遊羅敷潭

行歌入谷口。路盡無人躋。攀崖度絕壑。弄水尋迴溪。雲從石上起。客到花間迷。淹留未盡興。日落群峯西。齊賢曰左傳註躋升也

春陪商州裴使君遊石娥溪

裴公有仙標。拔俗數千丈。澹蕩滄洲雲。飄颻紫霞想。剖竹商洛間。政成心已閑。蕭條出世表。冥寂閉玄關。士贇曰黃庭內景玉經曰上清紫霞虛皇前註云紫霞之宮一名紫瓊宮王簡栖頭陀寺碑曰玄關幽鍵感而遂通我來屬芳節。解

榻時相悅。褰帷對雲峯。揚袂指松雪。暫是出東城。邊遂遊西巖。前橫天聳翠。壁噴壑鳴紅泉。尋幽殊未歇。愛此春光發。溪傍饒名花。石上有好月。命駕歸去來。露華生翠苔。淹留惜將晚。復聽清猿哀。清猿斷人腸。遊子思故鄉。明發首東路。此歡焉可忘。

陪從祖濟南太守泛鵲山湖三首

初謂鵲橋近。寧知湖水遙。此行殊訪戴。自可

緩歸橈

齊賢曰唐齊州濟南郡治歷城縣子猷訪戴事見前

其二

湖闊數千里湖光搖碧山湖西正有月獨送

李膺還

齊賢曰郭太遊洛陽見河南尹李膺膺大奇之後歸鄉里衣冠諸儒送至河林宗與李膺同舟而濟衆賓望之以為神仙太白以方李膺

其三

水入北湖去舟從南浦回遙看鵲山轉却似

送人來

齊賢曰南浦在鵲湖之南

春日陪楊江寧及諸官宴北湖感古

作金陵

昔聞顏光祿攀龍宴京湖樓船入天鏡帳殿

開雲衢君王歌大風如樂豐沛都延年獻佳

作邈與詩人俱

齊賢曰丹陽郡圖經樂遊苑晉時藥圃元嘉中築堤壅水

名為北湖漢高祖過沛酒酣上擊筑自歌曰大風起兮雲飛揚安得猛士兮守四方我

來不及此獨立鍾山孤楊宰穆清風一作芳

聲騰海隅英僚蒲四座粲若瓊林敷鷁首弄

倒景蛾眉綴明珠新絃採一作來梨園古舞嬌

吳歆曲度繞雲一作清漢聽者皆歡娛齊賢曰北山移

文鍾山之英即今建康蔣山也士贊曰唐禮樂志初隋有法曲其聲清新而近雅玄宗酷

愛法曲選坐部伎弟子三百人教於梨園謂之梨園弟子雞棲何嘈嘈公

一作月沸笙竽古之帝宮苑今乃人推蘇感

此勸一觴願君覆瓢壺榮盛一作盛時當作樂無

令後賢吁齊賢曰日月令仲夏調笙竽金陵六朝之故都晉灼曰樵取薪蘇取草

士贊曰嘈嘈衆聲也未句意蓋自國風山有樞中來也

宴鄭參卿山池

爾恐碧草晚我畏朱顏移愁看楊花飛置酒

正相宜歌聲送落日舞影迴清池今夕不盡

杯留歡更邀詩

遊謝氏山亭

淪老卧江海再歡天地清病閑久寂寞歲物

徒芬榮借君西池遊聊以散我情掃雪松下

去。捫蘿石道行謝公池塘上。春草颯已生。花

枝拂人來。山鳥向我鳴。田家有美酒。落日與之傾。醉罷弄歸月。遙欣稚子迎。

○把酒問月

故人賈淳令予問之

青天有月來幾時。我今停杯一問之。人攀明月不可得。月行却與人相隨。皎如飛鏡臨丹闕。綠煙滅盡清暉發。但見宵從海上來。寧知曉向雲間沒。白兔擣藥秋復春。嫦娥孤棲與誰鄰。今人不見古時月。今月曾經照古人。古人今人若流水。共看明月皆如此。唯願當歌對酒時。月光長照金樽裏。

同族姪評事黯遊昌禪師山池二首

遠公愛康樂。爲我開禪關。蕭然松石下。何異清涼山。花將色不染。水與心俱閒。一坐度小劫。觀空天地間。

齊賢曰乾封二年宣律師在長安城南淨業寺脩道忽有

一大人來至彼自言姓王名璠因問曰自昔

樞傳文殊在清涼山領五百仙人說法結中明文曰文殊久住娑婆世界如何偏在此方答曰文殊是諸佛之元師隨緣利見但知仰

信多在清涼山五臺之中今屬代州西五臺
縣清涼府今五臺山東南三十里見有大孚
靈鸞寺有花園可二頃許四時發將色類不
同人移花栽別處皆不生唯在園內方得久
榮或云漢明所植或云魏孝文栽植如何答
曰但是二帝所作士贊曰老子說常清淨經
曰觀空亦空
空無定空

其二

客來花雨際秋水落金池片石寒青錦踈楊
挂綠絲高僧拂玉柄童子獻雙梨惜去愛佳
景煙蘿欲暝時齊賢曰金陵雨花臺梁武帝時
有僧講經於此天雨寶花此

臺在長干山之頭後漢驃國王居
有二池以金為堤舟楫皆飾金寶

金陵鳳凰臺置酒

置酒延落景金陵鳳凰臺長波寫萬古心與
雲俱開借問往昔時鳳凰為誰來鳳凰去已
久正當今日迴明君越義軒天老坐三台豪
士無所用彈絃醉金壘東風吹出花安可不
盡杯六帝沒幽草深宮冥綠苔置酒勿復道
歌鐘但相催齊賢曰鳳凰臺在金陵宋元嘉
中王顓見異鳥集于山時謂鳳

鳳遂起臺於山義軒伏羲軒轅也列子注云
天老力牧太山稽三人黃帝之相六帝吳晉
宋齊梁
陳也

秋浦清溪雪夜對酒客有唱鷓鴣者

披君一作我貂襜褕對君白玉壺雪花酒上滅

頓覺夜寒無客有桂陽至能吟山鷓鴣清風

動窻竹越鳥起相呼持此足為樂何煩笙與

竿齊賢曰說文直裾謂之襜褕唐郴州桂陽

背上間紫赤毛多
對啼自呼社薄州

與周剛清溪玉鏡潭宴別

潭在秋浦
桃胡陂下

康樂上官去永嘉遊石門江亭有孤嶼千載

跡猶存我來源秋浦三入桃陂源千峯照積

雪萬壑盡啼猿與與謝公合文因周子論齊賢

曰謝康樂有登石門最高頂詩石門澗六處
石門退水上兩山兩邊石壁右邊石岩下臨

澗水秋浦
見前卷掃塵去落葉席月開清樽溪當大

樓南溪水正南奔迴作玉鏡潭澄明洗心魂

此中得佳境可以絕囂喧清夜方歸來酣歌

出平原別後經此地為余謝蘭蓀齊賢曰大

遊秋浦白筇陂二首

何處夜行好月明白筇陂山光搖積雪猿影
挂寒枝但恐佳景晚小令歸棹移人來有清
興及此有音相思

其二

白筇夜長嘯爽然溪谷寒魚龍動陂水處處
生波瀾天借一明月飛來碧雲端故鄉不可

見腸斷正西看

宴陶家亭子

曲巷幽人宅高門大士家池開照膽鏡林吐
破顏花綠水藏春日青軒祕晚霞若聞絃管
妙金谷不能誇齊賢曰照膽言池水之清照
人如見肝膽晉石崇有別館
在河陽之金
谷一名梓澤

在水軍宴韋司馬樓船觀妓

搖曳帆在空清流一作順歸風詩因鼓吹發

酒爲歛歌雄對舞青樓妓雙鬟白玉童行雲

且莫去留醉楚王宮

齊賢曰謝玄暉有鼓吹曲蔡邕曰鼓吹歌軍樂

也謂之短簫饒歌黃帝岐伯所作王贊曰白玉童言其童之顏如白玉也

流夜郎至江夏陪長史叔及薛明府

宴興德寺南閣

紺殿橫江上青山落鏡中岸迴沙不盡日映

水成空天樂流

一作

香閣蓮舟颺晚風恭陪

竹林宴留醉與陶公

齊賢曰說文紺深青色齊景公造蓮舟令宮人

綵女撐之以鬪名競渡亦名花競陶潛性嗜酒家貧不能常得親舊知其如此或置酒招之造飲輒盡期必醉而退曾不吝情

泛沔州城南郎官湖

并序

乾元歲秋八月白遷於夜郎遇故人尚

書郎張謂出使夏口沔州牧杜公漢陽

宰王公觴于江城之南湖樂天下之再

平也方夜水月如鍊清光可掇張公殊

有勝槩四望超然乃顧白曰此湖古來

賢豪遊者非一。而在踐佳景。寂寥無聞。夫子可為我標之嘉名。以傳不朽。白因舉酒酌水。號之曰郎官湖。亦猶鄭圃之有僕射陂也。席上文士。輔翼岑靜。以為知言。乃命賦詩紀事。刻石湖側。將與大別山共相磨滅焉。

張公多逸興。共泛沔城隅。當時秋月好。不減武昌都。四座醉清光。為歡古來無。郎官愛此

水。因號郎官湖。風流若未減。名與此山俱。

日漢陽本沔州武德四年以沔陽郡之漢陽
故都羊祜鎮襄陽樂山水每風景必造峴山
置酒嘗慨然嘆息謂中郎鄒湛等曰自有宇
宙便有此山由來賢達勝士登此如我與卿
等者多矣皆湮滅無聞使人悲傷湛曰公令
聞今望必與此山俱若
湛輩乃當如公言耳

陪侍郎叔遊洞庭醉後三首

今日竹林宴。我家賢侍郎。三杯容小阮。醉後

發清狂。齊賢曰嵇康與山濤阮籍兄子咸王

戎向秀劉伶為竹林之遊世謂竹林

七賢咸字仲容雖處世不交人事惟共親知
絃歌酣宴而已籍子運有父風少慕通達不
飾小節籍謂曰仲容已豫吾此流汝不得復
爾士贊曰蘇林曰凡狂者陰陽厯盡濁今此
人不狂似狂者
故言清狂在也

其二

船上齊橈樂湖心泛月歸白鷗閑不去爭拂

酒筵飛齊賢曰楚詞注橈小楫也方言曰楫謂之橈或謂之掉

其三

刻却君山好平鋪湘水流巴陵無限酒醉後

洞庭秋齊賢曰君山在洞庭東距巴陵四十里登岳陽樓望之橫陳其前君山之

夜泛洞庭尋裴侍御清酌

日晚湘水綠孤舟無端倪明湖漲秋月獨泛
巴陵西遇憇裴逸人巖居陵丹梯抱琴出深
竹爲我彈鷓鴣曲盡酒亦傾北窓醉如泥人

生且行樂何必組與珪齊賢曰湘水巴陵事

曲名古琵琶
絃用鷓鴣雞筋

陪族叔刑部侍郎擘及中書賈舍人

至遊洞庭五首

洞庭西望楚江分。水盡南天不見雲。日落長

沙秋色遠。不知何處乎湘君。齊賢曰岷江從

前與洞庭之水合而東行潭州長沙郡在洞

庭上流三百餘里河圖玉版曰堯之二女為

舜妃死葬於此塚在縣北一百六十里青草

山十贊曰此時賈至與岳州司馬與白均

逐臣邂逅而為洞庭之遊作是詩也亦屈原

睠顧宗國繫心懷主之意乎時帝在西京故

曰西望也楚江分者有秦楚之隔也水盡南

天不見雲者猶晉明帝所謂舉目只見日不

見長安之義雲者就之如日望之如雲之義

亦謂南天隔遠西望吾君不可得而見也日

落長沙秋色遠者謂晚景而遭末造之時也

遠者日以踈遠也不知何處甲湘君者蓋舜

之墓也三妃不得從焉是又即湘君之事而

重感明皇王后楊妃之事故曰不知何處也

其二

南湖秋水夜無煙。耐可乘流直上天。且就洞

庭賒月色。將船買酒白雲邊。

庭賒月色將船買酒白雲邊

其三

洛陽才子謫湘川元禮同舟月下仙記得長

安還欲笑不知何處是西天齊賢曰後漢郭泰歸鄉李膺送

之同舟而濟衣冠望之若神仙元禮李膺字也士贇曰賈生洛陽之才子按唐書本傳賈至字幼鄰玄宗幸蜀拜起居舍人知制誥歷中書舍人至德後坐小法貶岳州司馬太白故以賈生事比之也此詩雖遊賞之作然末句隱然有睠顧宗國繫心君主之意其視前輦所評杜甫之詩一飯不忘君者夫何慊之有哉

其四

洞庭湖西秋月輝瀟湘江北早鴻飛醉客蒲

船歌白紵不知霜露入秋衣齊賢曰白紵歌云皎皎白紵節

節為雙蓋吳音呼紵為緒當塗有白苧亭宋武帝與群臣會于此為白苧之歌

其五

帝子瀟湘去不還空餘秋草洞庭間淡掃明

湖開玉鏡丹青畫出是君山齊賢曰帝子堯女舜妃也青草

湖在金沙堆上堆下即洞庭君山居洞庭東正對岳陽自瀟湘來望之如脩眉見於鏡中

楚江黃龍磯南宴揚執戟治樓

五月入五洲碧山對青樓故人楊執戟春賞
楚江流一見波漂月三杯歌棹謳桂枝攀不
盡他日更相求士贊曰執戟事見二卷

銅官山醉後絕句

我愛銅官樂千年未擬還要須迴舞袖拂盡

五松山

齊賢曰唐宣州南陵縣武德四年隸池州廢屬宣州後析置義安縣又廢義安為銅官治利國山有銅有鉄

與南陵常贊府遊五松山

安石泛溟渤獨嘯長風還逸韻動海上高情

出人間靈異可並跡澹然與世閑

齊賢曰世說謝安石

與孫興公汎海吟笑事見前

我來五松下置酒窮躋攀微

古絕遺老因名五松山五松何清幽勝境美

沃州蕭颯鳴洞壑終年風雨秋響入百泉去

聽如三峽流剪竹掃天花且從傲吏遊龍堂

若可憇吾欲掃精修

齊賢曰高僧傳支遁投跡剡山於沃州東嶺立

寺行道晚移石城山有精舍在南陵銅井西五里

宣城青溪

一云入清溪山

青溪勝桐廬水木有佳色山貌日高古石容
天傾側綵鳥昔未名白猿初相識不見同懷
人對之空嘆息

齊賢曰桐廬縣新安東陽二水合於此仍東流為浙江

與謝良輔遊涇川陵巖寺

乘君素舸泛涇西宛似雲門對若溪且從康

樂尋山水何必東遊入會稽

齊賢曰唐宣州涇縣以涇溪而

名若耶溪雲門在越州會稽縣南

遊水西簡鄭明府

天宮水西寺雲錦照東郭清湍鳴迴溪綠水

繞飛閣涼風日瀟洒幽客時憇泊五月思貂

裘謂言秋霜落石蘿引古蔓岸筍開新穉吟

翫空復情相思爾佳作鄭公詩人秀逸韻宏

寥廓何當一來遊愜我雪山諾

士贊曰五月思貂裘此極

涼之形容也

九日登山

淵明歸去來不與世相逐為無杯中物遂偶

本州牧因招白衣人笑酌黃花菊齊賢曰陶潛賦歸去

來事見前刺史王弘欲識潛往廬山令其故

人龐通之齋酒具於半道栗里要之潛有脚

疾使一門生一兒舉籃輿及至欣然便共飲

酌俄頃弘至亦無忤也晉陽秋曰陶潛九日

無酒出宅邊菊叢中坐久之望見白衣人來

乃刺史王弘送酒即便就酌取醉而後歸

我來不得意虛過重陽時題輿何俊發遂結

城南期築土按響山俯臨遠水湄胡人叫玉

笛越女彈霜絲自作英王宵斯樂不可窺赤

鯉湧琴高白龜道冰夷靈僊如彷彿莫醉遙

相知齊賢曰霜絲白絲也列仙傳琴高趙人

冀州涿郡間二百餘年後辭入涿水中取龍

子與弟子期曰候我於水傍祠屋果乘赤鯉

來出祠中留月餘復入水去九域志宣州琴

溪即琴高控鯉之地山海經從極之川冰夷

常都焉冰夷人面而乘龍郭璞曰冰夷馮夷也古來登高人今復幾
人在滄洲違宿諾明日猶可待連山似驚波
合沓出溟海揚袂揮四座醕酤安所知齊歌
送清揚起舞亂參差賓隨落葉散帽逐秋風

吹別後登此臺願言長相思

齊賢曰孟嘉為桓温參軍九月

九日遊龍山嘉醉有風吹落帽而不知

九日

今日雲景好水綠秋山明携壺酌流霞

寒音

菊泛寒榮地遠松石古風揚絃管清窺觴照

歡顏獨笑還自傾落帽醉山月空歌懷友生

齊賢曰說文舉拔取也

九日龍山飲

九日龍山飲黃花笑逐臣醉看風落帽舞

月留人

齊賢曰九域志太平州治當塗有龍山即桓温九月九日登此置酒風吹

孟嘉帽落處士贊曰禮記月令季秋之月菊有黃華

九月十日即事

昨日登高罷今朝更舉觴菊花何太苦遭此

兩重陽

陪族叔當塗宰遊化城寺升公清風

亭

化城若化出金榜天宮開疑是海上雲飛空
結樓臺升公湖上一作秀粲然有辯才濟人
不利已立俗無嫌猜子見水中月青蓮出塵
埃閑居清風亭左右清風來當暑陰廣殿太
陽為徘徊齊賢曰列子曰周穆王時西極之
國有化人來謁王同遊王執化人
之祛騰而上者中天迺及化人之宮構以金
銀絡以珠玉出雲雨之上王實以為清都紫
微鈞天廣樂帝之所居晉志海旁蜃氣象樓
臺廣野氣成宮闕升公化城寺僧也上贊曰
維摩詰經菩薩云何觀於衆生維摩詰言善
薩觀衆生如智者見水中月寶積偈曰日淨

脩廣如青蓮茗酌待幽客珍盤薦彫梅飛文何灑

落萬象為之摧季父擁鳴琴德聲布雲雷雖
遊道林室亦舉陶潛杯清樂動諸天長松自

吟哀留歡若可盡劫石乃成灰齊賢曰當塗

太白之叔為季父士贊曰高僧竺法蘭傳云
昔漢武帝穿昆明池底得黑灰問東方朔朔
云可問西域梵人後漢竺法蘭既至衆人追
問之蘭云世界終盡劫火洞燒此灰是也

分類補註李太白詩卷之二十

分類補註李太白詩卷之二十一

登覽

登錦城散花樓

日照錦城頭朝光散花樓金窻夾綉戶珠箔
懸銀鈎飛梯綠雲中極目散我憂一作愁暮雨
向三峽春江繞雙流今來一登望如上九天

遊齊賢曰成都記府城亦呼為錦官城以江

山明麗錯雜如錦散花樓在摩訶池上蜀
王秀所建三峽明月峽巴峽巫峽蜀都賦帶
二江之雙流註蜀守李冰鑿離堆穿兩江為

人開田百姓享其利士贊曰三秦記明光宮皆珠璣為簾箔

登峨眉

蜀國多仙山峨眉邈難匹周流試登覽絕怪
安可息青冥倚天關彩錯疑畫出冷然紫霞
賞果得錦囊術雲間吟瓊簫石上弄寶瑟平
生有微尚歡笑自此畢煙谷如在顏塵累忽
相失儻逢騎羊子携手凌白日齊賢曰峨眉縣在嘉州西九十里唐折嘉州置眉州大峨之中有普賢閣背倚白崖峯餘十七峯共環之有茂真尊

者舊庵在峯下其傍一峯號呼應孫思邈所往來傳云茂真與孫嘗相呼而應故名大峨之巔一名勝峯山佛書以為普賢大士所居西王母出紫錦囊隱地入術經授茅君事見前郡國志吳孫皓時滕脩為廣州刺史未至州有五仙人騎五色羊來迎

大庭庫

朝登大庭庫雲物何蒼然莫辨陳鄭火空靈
鄒魯煙我來尋梓慎觀化入寥天古木翔氣
多松風如五絃帝圖終冥沒歎息蒲山川齊賢曰杜預左傳注大庭氏古國名在魯城內魯於其庭作庫高顯故登以望氣昭公十八年

五月宋衛陳鄭皆火梓慎登大庭之庫
望之曰宋衛陳鄭也數日皆來告火

登單父陶少府半月臺

陶公有逸興不與常人俱築臺像半月廻向

一作出高城隅置酒望白雲商一作高颺起寒梧

秋山入遠海桑柘羅平蕪水色綠且明一作清

令人思鏡湖終當過江去愛此暫踟躕

天台曉望

天台鄰四明華頂高百越門標赤城霞樓樓

滄島月憑高登遠覽直下見溟渤雲垂大鵬

翻波動巨鼇沒風潮爭洶湧神怪何翕忽觀

奇跡無倪好道心不歇攀條摘朱實服藥鍊

金骨安得生羽毛千春卧蓬闕齊賢曰抱朴

人身體故能令人不老不死士贊曰臨海記

云天台山超然秀出山有八重視之如一高

一萬八千丈周回八百里洞天福地記云天

台山名上清玉平之天即桐栢真人所理亦

名桐栢山四明山在今明州西八十里山有

峯最高四穴在峯上每天色晴霽望之如戶

牖相倚華頂峯在天台縣東北六十里蓋天

台第八重最高其高一萬丈絕頂東望滄海

俗號望海尖草木薰郁殆非人世赤城山在天台縣東六里一名燒山其上石壁皆如霞色望之如錐堞然其後人以此名之

早望海霞邊

四明三千里朝起赤城霞日出紅光散分輝

照雪厓一食嚙瓊液五內發金沙舉手何所

待青龍白虎車

齊賢曰瀑布山天台之西南峯水從南巖懸注望之如曳

布即雪厓也神仙傳沈羲吳郡人得道帝令遣仙官薄延乘白鹿車司馬生乘青龍車徐福乘白虎車召羲共載升天士贊曰魏柏陽參同契曰薰蒸入五內顏色悅澤好

焦山望松寥山

齊賢曰焦山在鎮江府大江中

石壁望松寥宛然在碧霄安得五綵虹駕天

作長橋仙人如愛我舉手來相招

杜陵絕句

南登杜陵上北望五陵間秋水明落日流光

滅遠山

齊賢曰班固西都賦南望杜霸北眺五陵

登太白峯

西上太白峯夕陽窮登攀太白與我語為我

開天關願乘冷風去直出浮雲間舉手可近

月前行若無山一別武功去何時復見還齊賢

日唐志鳳翔府郿縣有太白山鬼谷子於此授蘇秦佐國之術錄異記金星之精墜於終南圭峯西因號太白山其精化為白石狀如美玉時有紫氣覆之天寶中元宗立玄元廟夢神人曰太白北谷有玉石可琢取之紫氣見處是也使求得之琢象高二丈士贊曰毛詩註曰山西曰夕陽

登邯鄲洪波臺置酒觀發兵

我把兩赤羽來遊燕趙間天狼正可射感激

無時閑觀兵洪波臺倚劍望玉關請纓不繫

越且向燕然山風引龍虎旗歌鐘昔追攀擊

筑落高月投壺破愁顏遙知百戰勝定掃鬼

方還齊賢曰家語赤羽若曰白羽若月晉志

孤星在狼東南主備盜賊常向於狼終軍字子雲南越與漢和親軍自請願受長纓必羈

南越王致之闕下軍遂往說越王王請舉國南屬天子大說竇憲遣閻盤等與北單于戰

于稽落山大破之於是入十一部率眾降登燕然山刻石勒功令班固作銘樂書筑類其

用儒術對酒設樂必雅歌投壺鬼方國名皆

登新平樓

去國登茲樓懷歸傷暮秋天長落日遠水淨
寒波流秦雲起嶺樹胡鴈飛沙洲蒼蒼幾萬
里目極令人愁

謁老君廟

先君懷聖德靈廟肅神心草合人蹤斷塵濃
鳥跡深流沙丹竈滅關路紫煙沉獨傷千載
後空餘松栢林齊賢曰關令尹喜望紫氣知
老子入關與俱之流沙事詳

見前卷上贊曰唐知
老子故白稱為先君

秋日登揚州西靈塔

寶塔凌蒼蒼登攀覽四荒頂高元氣合標出
海雲長萬象分空界三天接畫梁水搖金刹
影日動火珠光鳥拂瓊簾度霞連綉拱張目
隨征路斷心逐去帆揚露浩梧楸白霜摧橘
柚黃玉毫如可見於此照迷方齊賢曰鎧婆
刹國自交州
浮海而至多火珠大者如雞卵白
照數尺日中以艾藉珠輒火出

登金陵冶城西北謝安墩

此墩即晉太傅謝安

與右軍王羲之同登超然有高世之志余將營園其上故作是詩也

晉室昔橫潰永嘉逐南奔沙塵何茫茫龍虎

鬪朝昏胡馬風漢草天驕蹙中原

齊賢曰晉永嘉五胡

亂華元帝南渡事見前光武紀四夷雲集龍鬪野史記匈奴天之驕子哲匠感

頽運雲鵬忽飛翻組練照楚國旌旗連海門

西秦百萬衆戈甲如雲屯投鞭可填江一掃

不足論

一作皇運有返正醜虜無遺寇談笑

過橫流蒼生望斯存冶城訪古跡

一作至今古城隅

猶有謝安墩憑覽周地險高標絕人喧想像

東山姿緬懷右軍言

齊賢曰哲匠指謝安也左傳楚子重伐吳使鄧

廖率組甲三百被練三千杜預注組甲漆甲

成組文被練練袍西秦符堅也堅以百萬之

衆伐晉以吾之衆投鞭於河足斷其流謝安

遣謝元等拒敵敗之謝安在東山人曰安石

不起當如蒼生何至此果能慰蒼生也冶城

丘陵也高梧桐識嘉樹蕙草留芳根白鷺映

春洲青龍見朝暎地古雲物在臺傾禾黍繁

我來酌清波於此樹名園功成拂衣去歸入

一作武長嘯齊賢曰白鷺洲在金陵城下秦淮之外青龍蒼龍之宿角亢氏房心尾箕也黍離詩周大夫行役過故宗廟宮室盡為禾黍武陵源在今常德府

登瓦官閣

晨登瓦官閣極眺金陵城鐘山對北戶淮水

入南榮漫漫雨花落嘈嘈天樂鳴兩廊振法

鼓四角吟一作吹風箏杳出霄漢上仰攀日月

行山空霸氣滅地古寒陰生寥廓雲海晚蒼

注官觀平門餘闔闔字樓識鳳凰名雷作百

山動神扶萬栱傾靈光何足貴長此鎮吳京

齊賢曰瓦官閣事見前卷雨花臺在長干梁武時有僧講經於此天雨寶花霸氣六朝也吳有闔闔門宋元嘉有異鳥來集于此因建鳳凰臺有鳳凰樓

登梅岡望金陵贈族姪高座寺僧

鍾山抱金陵霸氣昔騰發天開帝王居海色

照宮闕群峯如逐鹿奔走相馳突江水九道

來雲端遙明沒時遷大運去龍虎勢休歇齊賢

日剛通曰秦失其鹿天下共逐此借以喻山之形也孔安國曰江於此州界分為九道

我來屬天清登覽窮楚越吾宗挺禪伯特秀

鸞鳳骨一作吾宗道門秀特異鸞鳳骨衆星羅青天明者獨

有月冥居順生理草木不剪伐煙窓引薔薇

石壁老野蕨吳風謝安屐白足傲履襪齊賢曰傳

曰明星之多不如一月之光晉書謝玄等既破符堅驛書至安喜還內過戶闕不覺屐齒

之折釋曇足白於面跣涉泥幾宿一下山一作

水未嘗汗時稱白足和尚來下山蕭然忘干謁談經演金偈降鶴舞海雪

時聞天香來了與世事絕佳遊不可得春風

惜遠別賦詩留巖屏千載庶不滅

登金陵鳳凰臺

鳳凰臺上鳳凰遊鳳去臺空江自流吳宮花

草埋幽徑晉代表衣冠成古丘三山半落青天

外二水中分白鷺洲總為浮雲能蔽日長安

不見使人愁齊賢曰宋元嘉中王觀見異鳥

孫權始都建鄴元帝南渡號為東晉三山及

白鷺洲事見前士贇曰此詩因懷古而動懷

君之思乎抑亦自傷讒廢望帝鄉而不見
乃觸境而生愁乎太白之志亦可哀也

望廬山瀑布水二首

西登香爐峯南見瀑布水挂流三百丈噴壑
數十里歛如飛電來隱若白虹起初驚河漢

一作半瀉銀河落半灑雲天裏一作半瀉仰觀勢轉雄

壯哉造化功海風吹不斷江山一作月還照空

空中亂灑射左右洗青壁飛珠散輕霞流沫

沸穹石而我樂名山對之心益閑無論漱瓊

液且得洗塵顏且諧宿所好永願辭人間賢齊

曰遠法師廬山記云山東南有香爐山孤峯秀起游氣籠其上若煙梁昭明太子之居棲隱也唐元宗始號開先山南山北有瀑布無慮十餘處香爐峯與雙劍峯在瀑布之傍水源在山頂人未有窮者或曰西入康王谷為水簾東為開先之瀑布深水會也

其二

日照香爐生紫煙遙看瀑布挂前川飛流直

下三千尺疑是銀河落半天一本題云望廬山香爐峯瀑布

曰廬山上舉星斗連日照香爐生紫煙下兩句同齊賢曰蘇東坡詩薛僕初入廬山有以

陳令舉廬山記見寄者且行且讀見其中有
徐頰和李白詩不覺失笑開先寺主求詩為
作一絕云帝遣銀河一派垂古來唯有謫
仙詞飛流濺沫知多少不為徐擬洗惡詩

登廬山五老峯

廬山東南五老峯青天削出金芙蓉九江秀

色可攬結吾將此地巢雲松

齊賢曰潯陽記山北有五峯於

廬山最為峻極其形如河中
虞卿縣前五老之形故名

江上望皖公山

竒峯出竒雲秀木含秀氣清宴皖公山巉絕

稱人意獨遊滄江上終日淡無味但愛茲嶺

高何由討靈異默然遙相許欲往心莫遂待

吾還丹成投跡歸此地

齊賢曰唐舒州同安郡治懷寧縣武德五

年析置皖陽有皖山宿松縣武德四年為嚴
州八年廢九域志宿松在舒州西南百四十
里僧粲大師以白衣謁二祖既得
法隱于皖公山今墓在山谷寺後

望黃鶴樓

東望黃鶴山雄雄半空出四面生白雲中峯

倚紅日巖巒行穹跨峯嶂亦冥密頗聞列仙

人於此學飛術一朝向蓬海千載空石室金
竈生煙埃玉潭祕清謐地古遺草木庭寒老
芝木蹇予羨攀躋因欲保閑逸觀音徧諸嶽
茲嶺不可匹結心寄青松永悟客情畢士贊曰相
如傳洞仙之儒居山澤間形容甚臞列仙傳
赤松子常止西王母石室中青松喻真性也

鸚鵡洲

鸚鵡來過吳江水江上洲傳鸚鵡名鸚鵡西
飛隴山去芳洲之樹何青青煙開蘭葉香風

暖岸夾桃花錦浪生遷客此時徒極目長洲

孤月向誰明

齊賢曰鸚鵡洲在鄂州江中

九日登巴陵置酒望洞庭水軍

九日天氣清登高無秋雲造化闢川嶽了然
楚漢分長風鼓橫波合沓蹙龍文憶昔傳遊
豫樓船壯橫汾今茲討鯨鯢旌旆何繽紛白
羽落酒樽洞庭羅三軍黃花不掇手戰鼓遙
相聞劒舞轉頽陽當時日停曛酣歌激壯士

可以摧妖氛握齟

初角切

東籬下淵明不足群

齊賢曰時賊逼華容縣故軍于洞庭以為長沙鄂岳之蔽士贊曰淮南子虞公與夏戰日欲落公以劒指日日還不落應劭曰握齟急促之貌此言淵明不足群者盖用武之時儒士必為所輕太白其以淵明自况乎

秋登巴陵望洞庭

清晨登巴陵周覽無不極
明湖映天光徹底
見秋色秋色何蒼然
際海俱澄鮮
山青滅遠
樹水綠無寒
煙來帆出江中去
鳥向日邊風

清長沙浦山空雲夢田
瞻光惜頽髮
閱水悲

徂年北渚既蕩漾
東流自潺湲
郢人唱白雪

越女歌採蓮聽此更腸斷
憑厓淚如泉

齊賢

宇記昇屠巴蛇於洞庭其骨若陵故曰巴陵長沙雲夢郢人白雪越女採蓮事見前

與夏十二登岳陽樓

樓觀岳陽盡川迴洞庭開
鴈引愁心去

一作鴈別

秋江去

山銜好月來雲間連下榻
天上接行杯

醉後涼風起吹人舞袖迴

登巴陵開元寺西閣贈衡岳僧方外

衡嶽有闡士五峯秀真骨見君萬里心海水

照秋月大臣南溟去問道皆請謁洒以甘露

言清涼潤肌髮明朝落天鏡香閣凌銀闕登

眺食惠風新花期啓發齊賢曰寶積經云有風輪名清涼能使一

雲普覆三千大千世界
士贊曰真骨事見前卷

與賈至舍人於龍興寺剪落梧桐枝

望瀼湖

剪落青梧枝瀼湖坐可窺雨洗秋山淨林光

澹碧滋水閑明鏡轉雲繞畫屏移千古風流

事名賢共此時齊賢曰郡國志夏潦奔注則溢為此湖冬則涸為平野

挂席江上待月有懷

待月月未出望江江自流倏忽城西郭青天

懸玉鉤素華雖可攬清景不同遊耿耿金波

裏空瞻鳩鵲樓齊賢曰漢書注鳩鵲觀在雲陽甘泉宮士贊曰按此詩亦

身在江海心存魏闕之意乎讀者
忽之使白心不白於後世惜哉

金陵望漢江

漢江迴萬里。派作九龍盤。橫潰豁中國。崔嵬
飛迅湍。六帝淪亡後。三吳不足觀。我君混區
宇。垂拱衆流安。今日任公子。滄浪罷釣竿。齊賢曰。江南六帝。吳。晉。宋。齊。梁。陳。通典。吳郡。吳興。丹陽。爲三吳。任公子。爲大釣。釣魚事。見前。

秋登宣城謝眺北樓

江城如畫裏。山晚望晴空。兩水夾明鏡。雙橋
落彩虹。人煙寒橘柚。秋色老梧桐。誰念北樓

上臨風懷謝公

齊賢曰。謝公。謝眺也。

望天門山

天門中斷楚江開。碧水東流至北迴。兩岸青
山相對出。孤帆一片日邊來。齊賢曰。輿地志。博望梁山。東西

隔江相對如門。相去數里。謂之天門。

望木瓜山

早起見日出。暮見棲鳥還。客心自酸楚。况對
木瓜山。齊賢曰。木瓜。河起六合縣。通天長縣。

登敬亭北二小山余時客逢崔侍御
並登此地

送客謝亭北逢君縱酒還屈盤戲白馬大笑

上青山迴鞭指長安西日落秦關帝鄉三千

里杳在碧雲間

齊賢曰謝亭謝眺亭也秦關謂函谷瓏坻二關也士贊曰

帝鄉指京師也按白此詩其亦身在江海心在魏闕之意乎食息不忘君豈特杜甫爲然迄今數百載未有發明之者惜哉

○○ 過崔八丈水亭

高閣橫秀氣清幽併在君。簷飛宛溪水窓落。敬亭雲。猿嘯風中斷。漁歌月裏聞。閑隨白鷗去。沙上自爲群。

齊賢曰宛溪敬亭山皆隸宣城

登廣武古戰場懷古

秦鹿奔野草逐之若飛蓬。項王氣蓋世紫電明。雙瞳呼吸八千人。橫行起江東。赤精斬白帝。叱咤入關中。兩龍不並躍。五緯與天同。楚滅無英圖。漢興有成功。按劍清八極。歸酣歌。

大風

齊賢曰史記削通對高帝曰秦失其鹿天下共逐高材疾走者先得焉張晏曰

以鹿喻帝位也史記項羽重瞳子漢書項梁為會稽守籍為裨將廣陵人召平為陳王狗

廣陵未下聞陳敗乃渡江矯陳王命拜梁楚王上柱國曰江東已定急引兵西擊秦梁乃

以八千人渡江而西高祖被酒夜徑澤中行前者還報有大蛇當徑高祖乃拔劍斬蛇行

數里醉因卧後人來至蛇所有一老嫗夜哭人問何哭曰吾子白帝子化為蛇當道今為

赤帝子斬之故哭忽不見關中言東自函谷西至壠坻兩關相去千里皆秦地故曰關中

兩龍羽與高祖也漢志元年十月五星聚于東井以歷推之從歲星也孟康曰歲星先至

為主故客謂張耳曰東井秦地漢王入秦五星從歲星聚當以義取天下高祖擊布還過

沛置酒沛宮酒酣自擊筑歌曰大風起兮雲飛揚威加海內兮歸故鄉 伊昔臨

廣武連兵決雌雄分我一杯羹太皇乃汝翁

戰爭有古跡壁壘頽層穹猛虎吟洞壑飢鷹

鳴秋空翔雲列曉陣殺氣赫長虹撥亂屬豪

聖俗儒安可通沉湎呼豎子狂言非至公撫

掌黃河曲嗤嗤阮嗣宗齊賢曰漢四年破楚

汜上羽乃引兵還相與臨廣武之間漢軍廣武就廢倉食羽亦軍廣武相守為高祖置太

公其上曰今不急下吾烹太公漢王曰吾與若俱北面受懷王約為兄弟吾翁即若翁必

欲烹而翁幸分我一杯羹相持未決羽曰天
下匈匈數歲者徒以吾兩人耳曩與漢王挑
戰決雌雄漢王笑謝曰吾寧聞智不聞力晉
阮嗣宗嘗登廣武見楚漢戰處嘆曰時無英
雄使豎子成名太白謂籍沉酒于酒
狂言妄呶如嗤嗤之氓不足據也

分類補註李太白詩卷之二十二

分類補註李太白詩卷之二十二
行役

安州應城玉女湯作

荆州記云有玉女乘車投此泉

神女歿幽境湯池流大川陰陽結炎炭造化

開靈泉地底爍朱火沙傍敲

氣盛貌

素煙沸珠

躍明月皎鏡涵空天氣浮蘭芳蒲色漲桃花

然精覽萬殊入潛行七澤連

齊賢曰唐安州應城縣西南八

十里有玉女池子

愈疾功莫尚變盈道乃全

虛賦楚有七澤

濯濯氣清泚晞髮弄潺湲散下楚王國分澆

宋玉田可以奉巡幸奈何隔窮偏獨隨朝宗

水赴海輸微涓齊賢曰楚都郢今江陵府驪山有溫泉明皇幸焉則玉女

湯亦可奉巡幸也惜乎出於窮僻之地徒與江漢朝宗王海耳士贇曰此雖紀詠詩然寄典則謂士不幸居僻遠之鄉雖抱王佐之才而無由自幸身在江海心存魏闕而已悲夫

之廣陵宿常二南顧北居

綠水接柴門有如桃花源忘憂或假草蒲院

羅叢萱暝色湖上來微雨飛南軒故人宿茅

宇夕鳥棲楊園還惜詩酒別深為江海言日

朝廣陵道獨憶此傾樽齊賢曰萱草忘憂綠水桃花源見二卷

夜下征虜亭

船下廣陵去月明征虜亭山花如綉頰紅火

似流螢齊賢曰丹陽記曰太安中征虜將軍謝安立此亭因以為名

下途歸石門舊居

吳山高越水清握手無言傷別情將欲辭君

挂帆去離魂不散煙郊樹此心鬱悵誰能論

有愧叨承國士恩雲物共傾三月酒歲時同

餞五侯門齊賢曰吳王夫差都姑蘇越王句踐都會稽五侯漢時王譚商音根

逢時也羨君素書常蒲按含丹照白霞色爛余

嘗學道窮冥筮夢中往往遊仙山何當脫屣

謝時去壺中別有日月天俛仰人間易凋朽

鍾峯五雲在軒牖惜別愁窺玉女窓歸來笑

把洪崖手齊賢曰壺中日月事見前卷鍾峯鍾山也隱居寺隱居

山陶公鍊液樓其間靈神閉氣昔登攀恬然

但覺心緒閑數人不知幾甲子昨夜猶帶冰

霜顏我離雖則歲物改如今了然識所在別

君莫道不盡歡懸知樂客遙相待齊賢曰南

字通明丹陽秣陵人十歲得葛洪神仙傳晝

夜研尋便有養生之志齊高帝作相引為諸

生侍讀上表辭祿止于茅山中立節自號華

陽隱居梁武既早與遊即位後書問不絕後

合飛丹色如霜雪服之體輕及帝服飛丹有

驗益重之人謂為山中宰相卒年八十五顏

色不變屈伸如常香氣累日石門流水徧桃

花我亦曾到秦人家不知何處得雞豕就中

仍見繁桑麻。脩然遠與世事間。裝鸞駕鶴又復遠。何必長從七貴遊。勞生徒聚萬金產。挹君去。長相思。雲遊雨散從此辭。欲知悵別心。易苦向暮春。風楊柳絲。齊賢曰：石門及桃源事見前。七貴謂呂霍上官趙丁傳王也。士贇曰：史陶朱公治產致千金。子孫脩其業而息之。遂至巨萬。

客中行

蘭陵美酒鬱金香。玉椀盛來琥珀光。但使主人能醉客。不知何處是他鄉。齊賢曰：唐沂州承縣本蘭陵武

德四年以縣置鄆州。更名承別置蘭陵。鄆城二縣正觀元年州廢。省蘭陵。鄆城以承屬沂州。本草鬱金苗似姜黃。花白質紅。末秋出莖心無實。根黃赤。嶺南亦有實。似小荳蔻。後漢哀牢國出琥珀。注云：松脂入地。千年為茯苓。茯苓千年為琥珀。

太原早秋

歲落衆芳歇。時當大火流。霜威出塞早。雲色

渡河秋。夢遶邊城月。心飛故國樓。思歸若汾

水。無日不悠悠。齊賢曰：說文：鸛鳴。關西曰：巧婦。關東曰：鸛鳴。春分鳴。則衆

芳生。秋分鳴。則衆芳歇。毛詩：云七月流火。唐晉州有臨汾。汾西二縣。太原府治。晉陽。士贇

太原府治。晉陽。士贇

曰後漢律歷志自亢八度至尾九度曰太火之次

奔亡道中五首

蘇武天上田橫海島邊萬重關塞斷何日

是歸年齊賢曰蘇武使匈奴不降匈奴徒武北海上無人處唐西州交河郡天山

縣有天山漢書田橫與其徒五百人入海居島中

其二

亭伯去安在李陵降未歸愁容變海色短服

改胡衣齊賢曰後漢書崔駰字亭伯為竇憲主簿前後奏記數十指切長短憲不

能容出為樂浪郡長岑長駟以遠去不之官而歸前漢書天漢二年貳師將軍李廣利將三萬騎擊匈奴於天山使李陵將其射士步兵五千出居延北欲以分匈奴兵毋令專走貳師陵既至而單于以兵八萬圍擊陵軍陵且引且戰八日未到居延百餘里匈奴遮狹絕道陵食乏而救兵不到遂降匈奴

其三

談笑三軍却交游七貴疎仍留一隻箭未射

魯連書士贇曰談笑却秦軍及魯仲連為書射聊城中遺燕將事並見前

其四

函谷如玉關幾時可生還洛陽為易水嵩嶽
是燕山俗變羌胡語人多沙塞顏申包惟慟
哭七日鬢毛斑土贊曰班超願生入玉門關
易水燕山及申包胥走秦庭
晝夜哭七日七夜
求兵救楚事見前

其五

森森望湖水青青蘆葉齊歸心落何處日沒
大江西歇馬傍春草欲行遠道迷誰忍子規
鳥連聲向我啼齊賢曰巴子規見前

郢門秋懷

郢門一為客巴月三成弦朔風正搖落行子
愁歸旋杳杳山外日茫茫江上天人迷洞庭
水鴈度瀟湘煙清曠諧宿好緇磷及此年百
齒何蕩漾萬化相推遷空謁蒼梧帝徒尋溟
海仙已聞蓬海淺豈見三桃園倚劍增浩歎
捫襟還自憐終當遊五湖濯足滄浪泉齊賢曰前
漢南郡江陵縣故楚郢都楚文王自丹陽徙
北後九世平王城之後十世秦拔楚郢徙東

郢月至八日上弦至二十三日下弦神仙傳
麻姑謂王遠曰向到蓬萊水又淺於往日漢
武內傳王母降漢宮侍女以玉盤乘仙桃七
顆大如鴨子形圓青色王母以四顆與帝三
顆自食帝將其核欲種之
母曰此桃三千年一生實

至鴨欄驛上白馬磯贈裴侍御

側壘萬古石橫為白馬磯亂流若電轉舉棹

揚珠輝臨驛卷緹幕升堂接綉衣情親不避

馬為我解霜威

齊賢曰玉篇緹黃色

荆門浮舟望蜀江

春水月峽來浮舟望安極正是桃花流依然

錦江色江色綠且明茫茫與天平逶迤巴山

盡搖曳楚雲行雪照聚沙鴈花飛出谷鶯芳

洲却已轉碧樹森森迎流目浦煙夕揚帆海

月生江陵識遙火應到渚宮城

齊賢曰明月峽隸渝州成

都府有錦江織錦濯其中則鮮明唐峽州夷

陵縣有巴山通典江陵縣有楚渚宮士贇曰

師古曰月令仲春之月始雨水桃始華蓋桃

方華時既有雨水洲谷冰泮眾流猥集波瀾

盛長故謂之桃華水而

韓詩傳云三月桃華水

三峽

巫山夾青天巴水流若茲巴水忽可盡青天
無到時三朝上黃牛三暮行太遲三朝又三
暮不覺鬢成絲齊賢曰巫山縣圖經巫山綿
亘七百里非午夜不見日月
江行彷彿九峯三峯在後不見巴江黃牛
峽在峽州高厓間有石如牽牛人黑牛黃

自巴東舟行經瞿塘峽登巫山最高

峯晚還題壁

江行幾千里海月十五圓始經瞿塘峽遂步

巫山嶺巫山高不窮巴國盡所歷日邊攀
蘿霞外倚穹石飛步凌絕頂極目無纖煙却

顧失丹壑仰觀臨青天齊賢曰自渝州明月
峽至夔州西陵峽四

千里鬼門關隔山即瞿塘峽上有瞿塘閣下
瞰灩澦堆其東小路數百步絕處即白帝祠
旁有三峽堂臨瞿塘峽口自此半日
至夔州士贇曰張揖曰寫石大石也青天若

可捫銀漢去安在望雲知蒼梧記水辨瀛海

周遊孤光晚歷覽幽意多積雪照空谷悲風

鳴森柯歸途行欲曛佳趣尚未歇江寒早啼

猿松暝已吐月月色何悠悠清猿響啾啾辭

山不忍聽揮策還孤舟

齊賢曰歸藏啓筮有白雲出自蒼梧

○ ○ 早發白帝城

一作白帝下江陵

朝辭白帝彩雲間千里江陵一日還兩岸猿

聲啼不盡輕舟已過萬重山

一作須臾過却萬重山齊賢曰

白帝城公孫述所築後為劉備屯戍之地改名永安夔州陸路至江陵府九百四十五里

○ 秋下荆門

霜落荆門江樹空布帆無恙挂秋風此行不

為鱸魚膾自愛名山入剡中

齊賢曰唐荆門縣隸江陵府荆

州記郡西沂江六十里南岸有山名荆門北岸有山名虎牙二山相對楚之西塞顧愷之

為殷仲堪參軍在荆門因假還仲堪特以布帆借之至破家遭風大敗與仲堪箋曰地名

破家真破家而出行人安穩布帆無恙晉張翰思鱸魚事見前剡縣隸會稽多名山水

江行寄遠

剡木出吳楚危檣百餘尺疾風吹片帆日暮

千里隔別時酒猶在已為異鄉客思君不可

得愁見江水碧

齊賢曰易繫辭剡木為舟說文槎邪斫木任贊曰史記張

騫乘槎乃剡全木為之至今
沅湘中有此名為舸艚船

宿五松山下荀媪家

我宿五松下寂寥無所歡
田家秋作苦鄰女
夜春寒跪進彫胡飯
月光明素盤令人慙
漂母三謝不能餐

齊賢曰楊惲書曰田家作苦子虛賦注彫胡菰菜也

下涇縣陵陽溪至澁灘

澁灘鳴嘈嘈兩山足
猿猱白波若卷雪側足
不容舸漁子與舟人
撐折萬張篙

齊賢曰小船曰舸

下陵陽沿高溪三門六刺灘

三門橫峻灘六刺走波瀾
石驚虎伏起水狀

龍縈盤何慙七里瀨
使我欲垂竿

齊賢曰甘州記桐廬

有七里瀨瀨下數里至嚴陵瀨

夜泊黃山聞殷十四吳吟

昨夜誰為吳會吟
風生萬壑振空林
龍驚不取水
中卧猿笑時聞巖下音
我宿黃山碧溪月
聽之却罷松間琴
朝來果是滄洲逸
酤酒

醍盤飯霜粟半酣更發江海聲容愁頓向杯中失

宿鰕湖

雞鳴發黃山暝投鰕湖宿白雨映寒山森森似銀竹提携採鉞客結荷水邊沐半夜四邊開星河爛人目明晨大樓去崗隴多屈伏當與提斧翁前溪伐雲木

齊賢曰說文鉞黑錫大樓隸宣城

懷古 三十四首

西施

西施越溪女出自苧羅山秀色掩今古荷花羞玉顏浣紗弄碧水自與清波閑皓齒信難開沉吟碧雲間句踐微絕豔揚蛾入吳關提携館娃宮杳眇詎可攀一破夫差國千秋竟不還

齊賢曰句踐以西施獻吳王事見前卷

士贇曰苧羅山在諸暨縣南五里靈岩山在蘇州城西二十里又名硯石山吳王之別苑在焉有館娃宮琴臺響屨廊西施洞山頂之屬

屬

王右軍

右軍本清真瀟灑在風塵山陰過羽客愛此
好鵝賓掃素寫道經筆精妙入神書罷籠鵝
去何曾別主人齊賢曰王羲之為右軍將軍
會稽長史庾亮臨薨上疏稱
羲之清真有覽裁
之雅愛鵝事見前

上元夫人

上元誰夫人偏得王母嬌嗟峨三角髻餘髮
散垂腰裘披青毛錦身着赤霜袍手提羸女

兒開與鳳吹簫眉語兩自笑忽然隨風飄

曰漢武內傳曰上元夫人道君弟子也亦玄
古以來得道總統負籍亞於龜臺金母事已
詳見前卷羸女秦穆公女
弄玉也喜吹簫作鳳鳴

蘇臺覽古

舊苑荒臺楊柳新菱歌清唱不勝春只今唯
有江西月曾照吳王宮裏人齊賢曰吳王夫
差都蘇州有桂

苑姑蘇臺春宵宮海靈館館娃閣以宮妓于
人為長夜飲造千石酒鍾作天池池中作青
龍舟舟中盛陳妓樂
日與西施為水戲

鷓鴣飛

越中覽古

越王句踐破吳歸義士還家盡錦衣宮女如

花蒲春殿只今唯有鷓鴣啼齊賢曰史記越

因而留圍之三年吳師敗復樓吳王於姑蘇

山吳王請成句踐欲許之范蠡曰謀之二十

商山四皓

白髮四老人昂藏南山側偃蹇松雲間冥翳

不可識雲窓拂青靄石壁橫翠色龍虎方戰

爭於焉自休息秦人失金鏡漢祖昇紫極陰

虹濁太陽前星遂淪匿一行佐明聖倏起生

羽翼功成身不居舒卷在胷臆宵冥合元化

茫昧信難測飛聲塞天衢萬古仰遺跡齊賢曰陳

留志韋便字宣明襄邑人常居園中世謂之

園公與河內軹人角里先生綺里季夏黃公

為友避秦入商山是為四皓後說高祖太子

道也晉志北極五星在紫宮中北辰最高者

又云心三星天王正位中星曰明堂天子位

為大辰前星為太子後星為元子說文霓屈

尅青赤或白色陰氣也郭璞曰雄曰虹謂陽

盛者雖曰蜺謂暗微者以喻戚夫人也

過四皓墓

我行至商洛幽獨訪神仙園綺復安在雲蘿尚宛然荒涼千古跡蕪沒四墳連伊昔鍾金鼎何年閉玉泉隴寒惟有月松古漸無煙木魅風號去山精雨嘯旋紫芝高詠罷青史舊名傳今日併如此哀哉信可憐

齊賢曰唐商州上洛郡商

洛縣四皓事見前

峴山懷古

訪古登峴首憑高眺襄中天清遠峯出水落寒沙空弄珠見遊女醉酒懷山公感嘆發秋興長松鳴夜風

齊賢曰峴山在襄陽南十里鄭交甫弄珠山公簡事見前

蘇武

蘇武在匈奴十年持漢節白鴈上林飛空傳一書札牧羊邊地苦落日歸心絕渴飲月窟水飢餐天上雪東還沙塞遠北捨河梁別泣

把李陵衣相看泣成血

齊賢曰天漢元年且

之盡歸漢使路充國等武帝嘉其義乃遣蘇
武持節送匈奴使留在漢者因厚賂單于單
于使衛律召降武受辭舉劍疑之武不動單
于乃幽武大窖中絕不飲食天雨雪武卧齧
雪與羶毛并咽之數日不死匈奴以為神乃
徙武北海無人處使牧羝武杖漢節牧羊
卧起操持節毛盡落明年李陵降乃使陵至
海上說之武曰必欲降武請畢今日之驩効
死於前陵曰嗟夫義士陵與衛律之罪上通
於天與我決去後昭帝即位數年與匈奴和
親求武等謂單于言天子射上林中得鴈足
有繫帛書言武等在某澤中單于驚謝有之
於是陵置酒賀武曰今足下還歸揚名於匈
奴功顯於漢室雖古竹帛所載何以過陵起

舞歌曰徑萬里兮度沙漠為君將兮奮匈奴
路穹絕兮矢刃摧士眾滅兮名已隕老母已
死雖欲報恩將安歸單于召會武官屬還者
九人武留匈奴凡十九歲李陵與蘇子卿詩
携手上河梁遊子暮何之江文通詣建平王
上書曰此少卿所以仰天搥心淚盡而繼之
也以血也

經下邳圯橋懷張子房

子房未虎嘯破產不為家
滄海得壯士推秦
博浪沙報韓雖不成
天地皆振動
潛匿遊下邳
豈曰非智勇
我來圯橋上
懷古欽英風
唯

見碧流水曾無黃石公嘆息此人去蕭條徐

泗空齊賢曰張良事見前卷

金陵三首

晉家南渡日此地舊一作長安地即帝王宅

山為龍虎盤一作碧雨樓臺蒲青山龍虎盤金陵空壯觀天

塹一作江塞淨波瀾醉客回撓去吳歌且自歡一作

誰云行路難齊賢曰晉元帝南渡即帝位都于建康諸葛亮曰鍾阜龍盤石城虎踞

其二

地擁金陵勢城迴江一作漢水流當時百萬戶

夾道起朱樓亡國生春草王宮沒古丘空餘

後湖月波上對江州一作瀛州

其三

六代興亡國三杯為爾歌苑方秦地少一作

山似洛陽多古殿吳花草深宮晉綺羅併隨

人事滅東逝與滄波齊賢曰六代吳晉宋齊梁陳也

秋夜板橋浦汎月獨酌懷謝朓

天上何所有，迢迢白玉繩。
斜低建章闕，耿耿對金陵。
漢水舊如練，霜江夜清澄。
長川瀉落月，洲渚曉寒凝。
獨酌板橋浦，古人誰可徵。
玄暉難再得，洒洒氣填膺。
齊賢曰：春秋元命苞曰：玉衡北兩星為玉星。

過彭蠡湖

謝公入彭蠡，因此遊松門。
余方窺石鏡，兼得窮江源。
前賞迹可見，後來道空存。
而欲繼風

雅豈云清心，魂雲海方助。
興波濤何足論，青嶂憶遙月。
綠蘿愁鳴猿，碧水或可採。
金膏秘莫言，余將振衣去。
羽化出囂煩。

齊賢曰：輿地志曰：自入湖三百三十里，窮於松門。東西十里，青松徧於兩岸。石鏡見前。繼風雅者，繼靈運也。士贇曰：晉許邁少恬靜，不慕仕進，徧遊名山，採藥欲斷穀，自後莫測所終。好道者皆謂之羽化。

入彭蠡經松門觀石鏡緬懷謝康樂

題詩書遊覽之志

二篇或同或異，故併錄之。

謝公之彭蠡，因此遊松門。
余方窺石鏡，兼得

窮江源欲將繼風雅豈徒清心寬前賞逾所
見後來道空存况屬臨汎美而無洲渚喧漾
水向東去漳流直南奔空濛三川夕回合千
里昏青桂隱遙月綠楓鳴愁猿水碧或可采
金精秘莫論吾將學仙去冀與琴高言士贊曰山
海經曰荆山漳水出焉而東南
流注于沮謝猷琴高事見前

廬江主人婦

孔雀東飛何處棲廬江小吏仲卿妻為客裁

縫君自見城烏獨宿夜空啼

齊賢曰虞衡志孔雀生高山山喬

木之上人取其雛育之喜卧沙中以沙自浴
自拍甚適蓋巢於山林下浴海岸雉者尾長
數尺生三年尾始長金碧晃曜時時自奮張
其尾團如錦橋俗謂之朝無朝時自晨至午
皆朝人聚觀之則奮迅不已若矜衍者古有
烏夜啼曲士贊曰古樂府有焦仲卿妻詞仲
卿為府吏不歸妻之父母逼之改
嫁妻守節而死此引以比之也

陪宋中丞武昌夜飲懷古

清景南樓夜風流在武昌使公愛秋月乘興
坐胡床龍笛吟寒水天河落曉霜我心還不

淺懷古醉餘觴懷古一作留客齊賢曰晉書徒乘秋夜往共登南樓俄而亮至諸人將起避之亮徐曰諸君少住老子於此與復不淺庾據胡床與浩等談詠竟夕武昌郡治武昌縣治故東鄂也楚子熊渠封中子紅於此乃唐鄂州江夏郡之武昌縣而唐鄂州乃晉武昌郡之沙羨縣沙羨有夏口對巧日如此則晉武昌自有南樓今鄂州南樓特後來名之耳太白豈未之考耶

望鸚鵡洲懷禰衡

魏帝營八極蟻觀一禰衡黃祖斗筭人殺之受惡名吳江賦鸚鵡落筆超群英鏘鏘振金

玉句句欲飛鳴鷲鷲啄孤鳳千春傷我情五

嶽起方寸隱然詎可平才高竟何施寡識冒

天刑至今芳洲上蘭蕙不忍生齊賢曰後漢

人有才辨而尚氣曹操欲見之不肯往操懷

忿欲殺之送劉表表不能容以江夏太守黃

祖性急故送衡與之祖長子射為章陵太守

大會賓客有獻鸚鵡者射舉危於衡前曰願

先生賦之衡筆不停綴文不加點後黃祖竟

殺之斗筭言器小也鸚鵡以喻黃祖孤鳳以

喻衡寡識冒天刑太白傷禰衡長傲使氣以喪其身也

宿巫山下

昨夜巫山下，猿聲夢裏長。桃花飛綠水，三月下瞿塘。雨色風吹去，南行拂楚王。高丘懷宋玉，訪古一霑裳。

王贊曰：巫山及宋玉賦高丘神女事見前

金陵白楊十字巷

白楊十字巷，北夾湖溝道。不見吳時人，空生唐年草。天地有反覆，宮城盡傾倒。六帝餘古

丘，樵蘇泣遺老。

齊賢曰：六帝吳晉宋齊梁陳。晉灼曰：樵取薪，蘇取草也。

謝公亭

蓋謝朓范雲之所遊

謝公離別處，風景每生愁。客散青天月，山空碧水流。池花春映日，窓竹夜鳴秋。今古一相接，長歌懷舊遊。

齊賢曰：世說過江諸人每至新亭飲宴，周顛中坐而嘆曰：風景不殊，舉目有江河之異，皆相視流涕。王贊曰：列子古猶今也。

紀南陵題五松山

聖達有去就，潛光愚其德。魚與龍同池，龍去魚不測。當時版築輩，豈知傳說情。一朝和殷人，光氣為列星。伊尹生空桑，指庖佐皇極。桐

宮放太甲攝政無愧色三年帝道明委質終

輔翼曠哉至人心萬古可為則時命或大繆

仲尼將其一作柰何鸞鳳忽覆巢麒麟不來過

龜山蔽魯國有斧且無柯歸來歸去來一作

來歸宵濟越洪波齊賢曰左傳聖達節老子

去虞號界通道所經有澗水壞道常使胥靡刑

人築護此道說賢而隱代胥靡築之以供食

說命高宗夢得說使百工營求諸野得諸傳

岩爰立作相莊子傳說之相武丁乘東維騎

箕尾而比於列星列子伊尹生空桑注伊尹

母居伊水上既孕夢神告曰舊水出而東走

無顧明目視舊水出東走十里顧視其邑盡

為水身因化為空桑有莘氏女子採桑得嬰

兒下空桑中命曰伊尹苞人養之長而賢為

殷相伊訓成湯既沒伊尹奉嗣王祗見厥祖

明言烈祖之成德以訓于王王未足變營于

桐宮王徂桐宮居憂克終允德伊尹以冕服

奉嗣王歸于亳詩箋云龜山蒙山也柯斧柄

士贊曰書注皇太極中也太甲成湯長孫

夜泊牛渚懷古此地即謝尚聞袁宏

牛渚西江夜青天無片雲登舟望秋月空憶

謝將軍余亦能高詠斯人不可聞明朝挂帆

席一作洞楓葉落一作紛紛

姑熟十詠

姑熟溪

愛此溪水閑乘流與無極漾楫怕鷗驚垂竿
待魚食波翻曉霞影岸疊春山色何處浣紗
人紅顏未相識齊賢曰宣州當塗縣姑熟溪自蕪湖東流至采石入江

丹陽湖

湖與元氣連風波浩難止天外賈客歸雲間
片帆起龜遊蓮葉上鳥宿蘆花裏少女棹歸

昔東坡先生

自黃州還過

當塗讀太白

姑熟十詠乃

梅堯大味曰

贗物敗笑豈

有李太白作

此語者乎今

既之其半矣

味絕少東坡

之言信然或

曰十詠及海來

乎笑笑乎僧

伽歌杯素草

書歌太白曰

集本无之乃

宋次道再編

時貪多務得

之通也俗人不

識見太白名

便謂好詩可登

一笑

舟歌聲逐流水

齊賢曰史龜策傳曰龜千歲乃遊蓮葉之上士贊曰丹陽湖在當塗縣東南七十里春秋元命苞曰水者五行始焉元氣之津也

謝公宅

青山日將暝寂寞謝公宅竹裏無人聲池中

虛月白荒庭衰草徧廢井蒼苔積唯有清風

閑時時起泉石齊賢曰太白渡牛渚至姑熟悅青山欲終焉謝公謝眺也

陵歆臺

曠望登古臺臺高極人目疊障列遠空雜花

間平陸閑雲入窓牖野翠生松竹欲覽碑上文苔侵豈堪讀上贊曰臺在當塗黃山上宋武帝南遊登此因建離宮焉

桓公井

桓公名已古廢井曾未竭石甃冷蒼苔寒泉湛孤用秋來桐暫落春至桃還發路遠人罕

窺誰能見清潔上贊曰桓公井在當塗東五里白紵山上桓温領妓遊山

奏樂好為白紵歌因名焉

慈姥竹

野竹攢石生含煙映江島翠色落波深虛聲

帶寒早龍吟曾未聽鳳曲吹應好不學蒲柳

凋貞心常自保上贊曰當塗縣西北四十五里有慈姥山山上出竹堪為

簫管李善文選注慈姥山竹作簫笛有妙聲故歷代常給樂府又呼為鼓吹山

望夫山

顛望臨碧空怨情感離別江草不知愁巖花

但爭發雲山萬重隔音信千里絕春去秋復

來相思幾時歇齊賢曰望夫化石事見前卷山在當塗縣正對和州郡樓

牛渚磯

絕壁臨巨川連峯勢相向亂石流湍間迴波
自成浪但驚群木秀莫測精靈狀更聽猿夜
啼憂心醉江上士贇曰牛渚山在當塗縣北
三十里山下有磯古津渡也

靈墟山

丁令辭世人拂衣向仙路伏鍊九丹成方隨
五雲去松蘿蔽幽洞桃杏深隱處不知曾化
鶴遼海歸幾度士贇曰丁令鳥事見前
靈墟山在當塗南十里


天門山

迥出江山上雙峯自相對岸映松色寒石分
浪花碎參差遠天際縹緲晴霞外落日舟去
遙迴首沉青靄齊賢曰天門
山見前卷

分類補註李太白詩卷之二十二

國朝李太白詩卷之二十一

國朝李太白詩卷之二十一
國朝李太白詩卷之二十一



程